

- 1^r Wer hochfart ist / vnd düt sich loben
- 2^r Vnd sitzen will alleyn vast oben
- 3^r Den setzt der tüfel vff syn kloben



Vberhebung der hochfart

- 1 Der füret vff eym strowen dach
- 2 Der vff der welt rûm setzt syn sach
- 3 Vnd all ding düt vff zytlich ere
- 4 Dem würt zû letst nüt anders me

q ij

5 Dann das syn won / jnn hatt betrogen
 6 So er buwt vff eyn regenbogen
 7 Wer wölbet vff eyn dännyn sul
 8 Dem würt ee zyt / syn anschlag ful
 9 Wer rüm vnd weltlich ere hie bgerdt
 10 Der wart nit / das jm dort me werdt /
 11 Manch narr halt sich gar hoch dar vmb
 12 Das er vß welschen landen kum
 13 Vnd sy zû schülen worden wiß
 14 Zû Bonony / zû Pauy / Pariß
 15 Zûr hohen Syen jnn der Sapiantz
 16 Ouch jnn der schül zû Orlyens
 17 Vnd den roraffen gsâhen hett
 18 Vnd Meter pyrr de Conniget /
 19 Als ob nit ouch jn tütscher art
 20 Noch wer vernunfft / syn / houbter zart
 21 Do mit man wißheytt / kunst möcht leren
 22 Nit not / so verr zû schülen keren
 23 Welcher will leren jn sym landt
 24 Der fyndt yetz bücher aller hand
 25 Das nyeman mag entschuldigen sich
 26 Er well dann liegen lasterlich
 27 Man meynt etwan / es wer keyn ler
 28 Dann zû Athenas über mer
 29 Dar noch man sy / byn walhen fandt
 30 Jetz sicht mans ouch jn tütschem land
 31 Vnd gbrâst vnß nüt / wer nit der wyn
 32 Vnd das wir tütschen vol wennt syn
 33 Vnd mögen keyn recht arbeit thûn
 34 Wol dem / wer hat eyn wisen sün

7 wölbet *GW5041 GW5046*] welbât *GW5047* 9 weltlich *GW5046 GW5047*] wettlich
GW5041 15 hohen *GW5046 GW5047*] hohe *GW5041* 23 Welcher *GW5046 GW5047*]
 Weller *GW5041*

35 Jch acht nit / das man vil kunst kunn
 36 Vnd stell do mit noch hochfart gwynn
 37 Vnd meynt dar *durch* syn stoltz / vnd klüg
 38 Wer wiß ist / der kan kunst genüg
 39 Wer lert durch hochfart / vnd durch gelt
 40 Der spiegelt sich alleyn der welt
 41 Glich als eyn nãrrin die sich mutzt
 42 Vnd spieglen dût / der welt zû tutz
 43 So sie vff spannt des tûfels garn
 44 Vnd macht vil selen zûr hellen farn
 45 Das ist das kützlin / vnd der klob
 46 Do durch der tûfel sûcht groß lob
 47 Vnd hat gefûret manchen hyn
 48 Der sich bedunckt vor witzig syn /
 49 Balaam gab Balach eyenen rott
 50 Das Jsrahel erzürnet gott
 51 Vnd nit môcht jn dem stritt beston
 52 Das es durch frowen zû môcht gon /
 53 Hett Judith sich nit vff gezyert
 54 Holofernes wer nit verfür /
 55 Jesabel streich sich varben voll
 56 Do sie meynt Jehu gfallen wol
 57 Der wiß man spricht / ker dich geschwynd
 58 Von frowen / sie reitzt dich zûr sünd
 59 Dann nãrrin vil sint also geil
 60 Das sie jr gsiecht bald biettent feil
 61 Vnd meynen / es sol schaden nüt
 62 Ob sie eyn blick dem narren gytt
 63 Worlich gesicht / bringt böß gedanck
 64 Vnd setzt eyenen vff den narren banck

q3r

q iij

37 durch] dnrch GW5046 44 zûr GW5041 GW5046] zû der GW5047 52 môcht GW5046
 GW5047] müst GW5041 57 spricht GW5046 GW5047] fpicht GW5041

65 Der dar noch lichtlich nit abstat
 66 Biß er den håher gfangen hatt /
 67 Hett Bersabee jrn lib bedeckt
 68 Sie wer durch ee bruch nit befleckt /
 69 Dyna wolt schowen frembde man
 70 Biß vmb jr jungfrowschafft sie kam /
 71 Eyn demüttig frow ist eren wert
 72 Vnd würdig / das sie werd geerd
 73 Aber Welch hochfart nymbt für hend
 74 Deren hochfart ist ouch gantz on end
 75 Die will ouch allzyt vornen dran
 76 Das nyeman mit jr gstellen kan /
 77 Die größt wisheyt vff aller erdt
 78 Jst / können thûn das yeder bgerdt
 79 Vnd wo man das für gû nit nymbt
 80 Doch können thûn das yedem zymbt
 81 Wer aber frowen thûn will recht
 82 Der muß syn ettwan me dann knecht
 83 Dann sie gar oft durch blôdikeyt
 84 Me thûn / dann durch jr lystigkeyt
 85 Der hochfart die do hant gotts haß
 86 Stigt stâts vff / ye baß vnd baß
 87 Vnd felt zû letst zû boden doch
 88 Zû Lucifer jnns hellenloch /
 89 Hôr hochfart / es kumbt dir die stundt
 90 Das du sprichst vß dym eygnen mundt
 91 Was bringt myn hoher muß mir freud
 92 So ich hie sitz jn trübsal / leyd /
 93 Was hilfft mich gelt / gû / vnd richtum
 94 Was hilfft der welt ere / lob / vnd rum

86 stâts *GW5046 GW5047*] stâtes *GW5041*

95 Er ist nüt dann eyn schätt gesyn
 96 Ougenblicklich ist es do hyn
 97 Wol dem / der diß als hat veracht
 98 Vnd hat alleyn ewigs betracht /
 99 Nüt dunckt eyn narren hie so hoch
 100 Es felt mit jm zů letzten doch
 101 Vnd vor vß / die schántlich hochfart
 102 Die hat an jr natur / vnd art
 103 Das sie den hõchsten Engel stieß
 104 Vom hymel ab / vnd ouch nie ließ
 105 Jm Paradiß den ersten man
 106 Sie mag noch nit vff erd bestan
 107 Sie muß ye sũchen jren stůl
 108 By Lucifer jn hellen pfůl
 109 Sũcht sie den / der sie hat erdacht
 110 Hochfart ist bald zůr hellen bracht
 111 Agar durch hochfart wart von huß
 112 Mit jrem kynd getriben vß /
 113 Durch hochfart Pharao verdarb
 114 Chore mit syner gselschafft starb
 115 Der herr gar grõßlich des erzurn
 116 Do man jn hochfart macht den thurn
 117 Als Daudid dett jn hochfart zelen
 118 Das volck / mũst er eyn plag erwelen
 119 Herodes kleidt jn hochfart sich
 120 Als ob syn wesen wer gõttlich
 121 Vnd wolt ouch haben gõttlich ere
 122 Vnd wart vom Engel gschlagen sere
 123 Wer hochfart tribt / den nydert gott
 124 Demůt er allzyt gehõheret hat

q4r

q iij

95 Er GW5046 GW5047] Es GW5041 104 nie GW5046 GW5047] nit GW5041